

迷

朱

質

疑

迓朱質疑卷之十四

當塗夏忻心伯甫學

記朱子外任政績下

馭官吏之政

一勸諭長貳和衷

周禮六官治教禮政軍刑各有攸掌設參傅伍陳殷置輔大事則從長小事則專達此成周之政所以無不舉也宋純熙令諸縣丞簿尉並日赴長官廳或都廳簽書當日文書謂之過廳後故事相沿不過茶湯相揖而退知縣既不謀之佐官

佐官亦不請於知縣。大率出於知縣一人。十數胥吏之手而已。朱子爲郡。一遵條法。逐日聚廳議事。應授接詞訴理斷公事。催督財賦。並要公共商量。簽押圓備。然後施行。其與星子諸縣書云。逐縣知佐。既是同在一縣。協力公家。當以至公至誠之心。相與自然政脩事舉。民受其賜。旨哉言乎。

一約束縱役侵擾

胥吏者。官長之爪牙也。不職之員。多縱侵擾。民受其害。而不能上達。卽有一二能上達者。本官旣袒護胥吏。上司復徇庇屬員。而民無所控訴矣。卽以浙東而論。保正副最爲重役。官

復略不加恤。一縣之內。有令有簿。有丞有尉。號爲四衙。雜出文引。如脩造廨舍。迎送官員。整葺祠宇。置造軍器。似此之類。其名不一。竹木瓦磚油漆麻苧等物。例以和買爲名。不曾支給分文。役使工匠。科差人夫。勒出錢米。陪備供輸。如遇縣官下鄉。公吏等亦用轎乘。無不取辦保正。椎剝肌膚。又以南康而論。類以和雇爲名。科差夫力。以供諸役。出入公幹。皆令保正。關喚人夫。荷轎擔擎。陪貼錢物。他如交納倉庫錢米。經日不得朱鈔。卽或朱鈔到手。而本縣重疊追擾。又如科賣民戶。麴引。及抑勒打酒諸害。不可勝數。朱子一一爲之約束。無少

寬貸行狀載朱子提舉浙東時郡縣官吏得其風采至有自引去者由是所部肅然可想見一時之風概矣

一計治不尙催科

撫字心勞催科政拙古之所謂循吏也後世之吏專以催科爲能而上之所以考察之者亦惟此可以報取於是苛刻武健之治興焉朱子提舉浙東時承尙書省劄子近來州郡以寬恤爲名將不係檢放倚閣之數故作稽滯劄下所司將管下州郡年額合起綱運嚴行督責起發朱子以狀論之云朝廷張官置吏本以爲民所以平時但聞朝廷戒勅州郡奉行

寬恤。惟恐有所不至。至於督責二字。考之前史。則韓非李斯慘刻無恩。誣誤人主之術。非仁人之所忍言也。所有前項朝旨。若便推行。竊恐有傷治體。某雖愚陋。委實不敢奉行。在南康荅呂伯恭書云。爲縣者。豈不欲了辦財賦。想亦是有做不行處。每握筆欲判此等文字。未嘗不慨然太息也。後之考察屬吏。專以催科爲能者。其亦聞朱子之風而興起乎。

一考察不受私謁

昔伊川先生與韓持國范夷叟泛舟於潁昌西湖。有一官員上書請謁。乃是求知己。伊川曰。大資居位。卻不求人。乃使人

倒來求已是甚道理。夷叟云：只爲正叔太執求薦章，常事也。伊川曰：只爲曾有不求者不與，來求者與之，遂致如此。持國便服。朱子浙東客次榜云：某叨被臨遣，專以刺舉爲名，不敢不悉心詢究。凡我同寮，究心職事，律已愛民，以待考察，不必投書獻啟，自陳腳色，挾恃勢援，宛轉求請，徒失所以自重之道，而反貽絀辱之羞也。程子之律人，與朱子之自律，均足爲正己率屬者法。

一薦舉以顯賢能

賢能之吏，民倚以爲命者也。醇正廉潔，豈弟君子，白賢有猷。

有爲利足及物曰能之二人者。盡心於民。無求於上。或悃悃
無華。奔走不能取悅。或狷介有守。苞苴恥於自媒。其幸焉者
不獲乎上。久而引去。其不幸者。或有意外之虞。而世之登薦
刻列舉牘者。固別有人在。宜乎吏治之日汙也。朱子舉龍溪
縣翁德廣狀曰。德廣天資剛直。不爲赫赫可喜之名。而有懇
懇愛民之實。庶幾古之循吏。又推原德廣平日孝友稱於宗
族。行誼信於鄉間。以爲勤事愛民之本。豈世俗之所謂賢能
者哉。又同監司薦權知邵州潘燾之庭訟日簡。郡囹空虛。曾與
周益公薦權知全州韓遜之民情利病。纖悉洞究。權通判邵

之見本狀

州蔡咸之措置有方。民被實惠。提刑司幹辦公事方詮之。器資宏裕。識趣高明。他如薦潘時舉以自代。乞留婺州通判趙善堅同本州守錢佃。措辦賑濟。熟知漳州知錄趙師慮之爲人。試之政事。又得其實。遂首薦之。其詞曰。履行深醇。持心明恕。聞者莫不心服。洵可謂大公無私。一時賢能之吏。莫不登諸薦牘矣。

一參劾不避權要

不職之吏。小則廢弛。大則貪酷。夫廢弛之罪雖輕。民受其害者已不少。況大而至於貪酷乎。古人云。一家哭。何如一路哭。

眞名言也。然其人或根據權要。或交結臺諫。其聲勢愈大。則
氣餒愈毒。而民之受其害者。幾於無所控訴矣。如臨漳之縣
官從事郎黃岌。紹興府差指使密克勤。紹興府都監賈祐之。
衢州元差監酒庫張大聲。龍游縣丞孫孜。知江山縣王職中。
朱子俱以不職前後奏請罷逐。衢州守李峴。專務掩飾。以親
戚方在政路。雖轉運司莫如之何。朱子則悉得其詳。劾罷之。
而其尤甚者。莫如前知台州唐仲友。仲友與丞相王淮爲姻
家。吏部尙書鄭丙。侍御史張大經。交薦之。遷江西提刑未行。
會朱子涉台州境。民訴仲友不法者紛紛。急趨台城。則訴者

益衆。因盡得其貪汙淫虐蓄養亡命諸欸。章三上。王惟匿不以聞。朱子論益力。始罷仲友。台州新任。時已久旱。雨遂大霑。是歲穀重熟。

經武之政

一條陳軍政

養兵至宋世。其弊極矣。孝宗之時。將帥類皆行賄於近習。以圖進用。而弊更不可言。朱子庚子。應詔上封事。論節軍貲之法。曰。選將帥。覈兵籍。論實軍儲之法。曰。開廣屯田。論益邊備之法。曰。練習民兵。反覆數百言。皆籌畫經久之計。壬申。奏事。

延和殿及上封事則專論將帥之通近習大旨以爲日者諸將之求進必先捨克士卒以直私財然後以此自結於陛下之私人則陛下所得以爲將帥者皆庸夫走卒不知兵謀國無望其可覈軍實而豐儲蓄矣至屯田尤所不願於是漕運煩費無以供州兵之食而民以益困忠言讜論惜孝宗之不能盡用也

一練習武藝

兵之於藝猶士之於學愈習則愈熟不習則不精在上之人有以董率之耳純熙二十三年朱子至同安二十五年縣有

盜與監鹽稅曹沆分備西北隅。士皆感奮爲用。相城之隅得隙地。斥以爲圃。屬其徒日射其間。而朱子爲之記。又葉賀孫錄云。某漳州初到時。教習諸軍弓射等事。皆無一人能之。後分軍作三番。每日輪番入校場挽弓。及等者有賞。其不及者。只管挽射。及等而止。終不及。則罷之。兩月之間。翕然會射。及上等者亦多矣。

一諭降洞獐

兵有必用者。亦有不必用者。必用之兵。臨事而懼。好謀而成。所謂我戰則克也。不必用者。感之以德化。示之以威信。務有

以服其心而已矣。朱子甲寅至潭州，會獠人蒲來矢作亂。朱子遣軍校田昇諭降，昇卽以數十輩馳往，取文書粗若告身者數十通自隨，諭以禍福。來矢喜，聽命，遂并其妻子，俘以至官，給衣冠，引赦不誅，是役也。兵未血刃，而洞獠歸化矣。

一移置勁旅

兵家貴形勢，據要害。旅雖勁，置之不得其所，猶不勁也。如朱子知南康軍時，朝廷議於都昌創寨。朱子特上劄子，以爲都昌並非要害之地，有尉司弓級七十五人，足以捍衛，不必增立營寨。至於荆湖南路安撫司飛虎軍，乃辛棄疾初置爲本

州勁旅後遙隸襄陽相去一千二百餘里實爲不便請仍隸湖南安撫司詔從之一不必創置一必移置俱審形勢相要害所謂因地以制宜也

一約束保甲

保甲之法什伍其民使之守護里閭覺察姦盜誠古今不易之良法然既許其蓄藏兵仗備置金鼓而害亦不可勝言朱子申禁保甲擅闕集劄子云目今現行條法但有團結教習之名初無戒令糾禁之法鄉里豪右平居挾財恃力已不可制一旦藉比尺寸之權妄以關集教閱爲名聚衆弄兵陵弱

暴寡托於保甲之名。欲望特賜敷奏。明降指揮。有敢恐脅官私。報怨拒捕者。比凡人特加一等收罪。庶幾豪強知畏。不敢敗壞良法矣。

一劾罷庸將

庸將與庸吏皆足以病兵而害民。不可不急加淘汰也。朱子安撫潭州時。值洞獠蕩來大作亂。又邵州被湖北獠賊侵犯。朱子訓練教閱。皆成勁旅。有本州具劄東南第八將武功郎陸景任。係管潭州禁軍八指揮。并有揀中軍兵幾及千人。又本州管下有產茶地分。及上江州軍各有悞洞。全賴官軍聲

勢彈壓。陸景任向來差遣。止是監當場務。未嘗嫻習軍旅。又兼之精力既衰。實係尸位養疴。不勝兵將之責。奏劾罷之。軍政爲之一肅。

救荒之政

純熙庚子。南康軍旱災。朱子大修荒政。年譜紀其凡活飢民大人一十二萬七千六百七口。小兒九萬二百七十六口。其設施次第。人爭傳錄以爲法。辛丑。湖東大旱。較南康尤甚。孝宗專倚朱子以救荒之事。朱子自十二月視事西興。至明年九月歸所活。至不可勝計。浙東戶歌朱子之德。孝宗亦以懿

究心稱之自古救荒之治未有過於朱子者也茲於惠間開之政外別出紀之庶幾吾黨之痼疾民瘼者有所取法焉

一脩德政

德政爲感召和氣之原一切救荒皆其後也文集上脩德政以弭天變狀其略曰爲今之計獨有斷自聖心沛然發號責躬求言然後君臣相戒痛省自改

一精祈禱

荒禮禱祠載於周官咏於宣雅古之制也然必至誠感神而後神始鑒之世俗有司奉行故事直謂之未嘗祈禱可耳年

譜是夏南康大旱。盛暑中。禱祠山川。卻蓋暴露。藁食逾月。文集祈雨謁北山文。廣祐廟祈雨文。豐利侯祈雨文。祈雨文。祈晴文。

一勸止流移

灾荒之始。民不耐目前之苦。遽爾流移。俗謂之逃荒。道途之艱苦。風雨之暴露。氣候之涼熱。口體之寒餓。疾疫之傳染。往往未及歸來。而死亡已大半矣。世鮮富鄭公。安得輕去時里。爲民上者。極力振濟。尤宜勸諭於始。勿使流移。庶將來得霑實惠云。文集勸諭救荒榜一條。勸諭不可容易流移。勸諭

逃移民戶

一先籌糴米

救荒非米不可。初荒之時，米未甚貴，多方糴之，則費省而活民多矣。語類滕璘錄在南康時，才見旱，便剗刷錢物，庫中得三萬來貫，準擬糴米，添支官軍，卻去上供錢內，借三萬貫糴米。振濟早時，糴得卻糴賤。文集與諸司論賑濟劄子：一安撫司振濟米，合於冬初差船搬運。一廣南最係米多去處，合從兩司多印文榜，委官收糴。一搬運米，須得十餘萬石，合早撥定本錢，選差官員，或募土豪，令速到地頭，趁熟收糴。

一招募米商并免貨稅

荒年之米莫要於通商米日多則價日減然招商之法非優免征稅則商人猶有所畏而不前也行狀朱子初拜命卽移書他郡募米商蠲其征及至浙東客州之米已輻輳文集奏救災事宜畫一狀云歲既不登全賴商賈阜通之利今米穀不得收稅雖有成法欲望特降睿旨所帶貨物並不得輒收分文稅錢

一勸諭獻助優給賞典

獻助賜爵自漢成帝始亦權宜之一法也朱子除浙東提舉

以南康納粟賞典未行。不受職名。及堂帖報賞典已行。乃受。其不肯失信於民如此。**文集**乞推賞獻助人狀。奏勸諭到賑濟人戶狀。奏救荒畫一事狀一條。去年獻助賞格。比乾道七年歲減米數之半。止於紹興一府施行。今乞於一路施行。奏救荒事宜畫一狀一條。獻助推賞乞刪去指揮內數語。減半賞格榜。

一富戶借貸貧民及主戶借佃戶稻種俱官爲追償

荒年獻助輸之於官。優以賞典。不責其償也。惟大有力者能之。至於鄉里借貸主戶存恤。許其出息追償。多方推廣。庶幾

野無餓殍云。文集勸諭救荒一條。上戶接濟貧戶。措借出放。許自依鄉例。將來填還不足。官司當爲根究。約束糴米及劫掠榜一條。火客佃戶耕作主家田土。主戶自當優恤。乞給借稻種狀。

一奏請公帑振民

荒政首曰散利。鄭氏以貸種食釋之。貸種食亦散利之一端。其實不盡是也。司救凡四時有天患民病。則以節巡國中及郊野。而以王命施惠。後世則謂之振。俗作賑說文振舉救也。謂舉金帛穀粟而救之也。責其償者曰振貸。不責其償者曰振。

濟爲法不同務期實惠及民而已宋孝宗最愛民又得朱子

至誠惻怛爲民請命故所施爲獨厚云文集乞撥錢米充軍

糧振濟狀內有放免租稅○奏借兌上供官錢糴米內有乞倚開夏稅○乞

截留米綱充軍糧振濟狀○乞撥賜檢放合納苗米充軍糧

狀○乞撥兩年苗稅劑子以上南康○乞借撥官會給降度牒狀

內有推賞廩助○奏巡歷合奏聞事件狀一條乞再借官會三十萬

貫痛減度牒之價○乞給降官會等事狀○奏救荒畫一事

狀一條乞給度牒官會再賜給降其度牒減價每道只賣五

百貫○奏救荒事宜畫一狀一條乞已蒙給降三十萬貫更

乞撥給湊作二百萬貫。奏明州乞給降官會及本司乞再

給官會度牒狀。再奏乞給降錢物。內有賊放住催水利等狀。巡歷至

台州奉行事件狀一條奉旨給降度牒三百道官會十五萬

緡。卽時分撥應副諸州。申乞將衢州義倉米緡濟狀。以上浙東

一奏請蠲停賦稅

荒政二曰薄征。高氏愈曰散利發已藏之公帑。薄征減未輸

之民租。宋制諸州歲歉凡賦租未入及入未滿者或縱不取

或寡取之。或倚閣以需。豐年皆周禮薄征之意。讀朱子請蠲

停賦稅各款。何其籌之備也。文集乞權行倚閣夏稅錢帛。內有

借兌上供
官錢糴米

○申南康旱傷狀一條乞放租稅及應副軍糧

以上

南

○乞給降官會等事狀一條乞將山陰等縣下戶夏稅秋

苗錢並行住催○乞將山陰等縣下戶夏稅和買役錢展限

起催狀○乞住催被災州縣積年舊欠狀○救荒蠶一事件

狀一條被災州郡督理夏稅特與寬限其紹興府去年住催

夏稅人戶先期輸納者理折今年夏稅○乞將合該蠲闕夏

稅人戶前期輸納者理折今年新稅狀○奏巡歷沿路災傷

事理狀令州縣不得刷具舊欠催督賦稅乞將嵯縣上虞餘

姚三縣新舊租稅特與倚閣○奏救荒事宜蠶一狀一條乞

將本路被災縣分人戶夏稅亦依分數蠲減至台州五縣第五等人戶今年丁絹特與蠲放乞被災州縣人戶苗米五斗以下不候檢踏先賜蠲放。乞台州免納丁絹狀。奏均減

紹興府和買狀

以上浙東

一親巡歷災區及差賢員檢視

附督察羅滑用人

荒政莫難於審戶非親巡歷災區及差賢員檢視則畏事之吏以多報少強橫之民以少爲多皆勢之所必至者行狀日與僚屬寓公鉤訪民隱分畫既定按行所部窮山長谷靡所不到每出乘單車屏徒從所歷雖廣而人不知文集約束檢

旱今歲適逢旱歉州縣合差官徧往鄉村檢視每官一人只帶廩子一名吏貼一名當直八名計日給錢米各自資帶不許分毫騷擾親行田畝從實檢放。奏救荒畫一事狀一條伏見州縣之吏不爲不多而才能忠信極不易得將來七州糴濟往來督察用人必廣乞許將得替待闕丁憂致仕及在法不應差出之官權行差使。新年舊乃選見任寄居指使添差監押酒稅監廟等大小使臣三十五員各監一場以轉振

濟南
康

一申請禁止過繼

告糴歸粟春秋美之過糴之禁葵卯申之俗吏不知大體私於已境而薄於鄰境烏知周官通財之義哉文集亡行遣欄米官吏劄子。亡申明閉糴指揮劄子。亡禁過糴

一分場濟糴米不日給

濟糴之法場少人多則飢餓未死之民反以擁擠而死且爲升合之米逐日領取反失常業均非策之善也年譜先是預戒三縣每邑市鄉村四十里則置一場以待賑糴分爲三十五場人戶赴場就糴其鰥寡孤獨則用常平米依令賑濟又慮農事將起凡合糴者皆濟半月大人一斗五升小兒七升

五合肯一頓與之。

一嚴禁劫奪

荒政終於除盜賊。盜賊倚荒劫奪。無以戢之。則亂成矣。辛棄疾帥湖南。揭振濟榜。首曰。劫禾者斬。司馬溫公論劫奪不治。始於寬仁而終於酷暴。意在活人而殺人實多。旨深哉。文集約束糶米及劫掠榜。勸諭救荒一條。如妄行需索。鼓眾作鬧。至奪錢米。定當追捉根勘。

一興工代振

附興脩水利

國家有必當振濟之飢民。又有必當興脩之工役。寓工於振。

古有成法。朱子最參。參於水利。故敷奏不外是云。文集乞支錢米修築石隄劄子。乞催修石隄劄子。奏巡歷台州奉行事件狀。一條支撥降到錢文興修黃巖水利。○奏救荒事宜畫一狀。一條所請百七十萬貫於內量撥什三興修諸州水利。再乞降錢物及減放住催水利等狀。

一荒後籌養元氣

民大荒之後。與大病之後無異。休養調護。元氣庶幾可復。若責以新賦。又復帶納其舊逋。民何以堪。文集繳納南康任滿合奏稟事件狀。

及門婺源程益恒校字

述朱質疑卷之十五

當塗夏忻心伯甫學

陳正獻公三薦朱子攷

黃勉齋朱子行狀凡召用下俱不著薦者姓名宋史本傳則載之然亦未備如紹興二十九年八月召赴行在本傳但云用輔臣薦而不言輔臣之爲何人年譜則云用執政陳俊卿薦按是時俊卿纔爲殿中侍御史去輔臣尚遠惟李心傳微之道命錄作陳康伯薦未悞

康伯自二十七年參知政事至
至隆興元年十二月罷相

陳正獻公俊卿三薦朱子見朱子所作行狀中俊卿本傳亦

云尤敬朱某。屢嘗論薦。而年譜所載二薦。首一薦。實非俊卿。本傳亦載二薦。而三不具。茲攷之列於左。用明正獻公以人事君之義焉。

宋史朱子本傳。乾道三年。陳俊卿劉珙薦爲樞密院編脩官。待次。

年譜。乾道三年。除樞密院編脩官。待次。用執政陳俊卿劉珙薦也。

析按此正獻公第一次薦朱子也。俊卿珙傳不言者。以已載於朱子之傳故也。

本傳純熙五年史浩再相除知南康軍。○陳俊卿以舊相守金陵過闕入見薦其甚力。

按此條宋史誤列應詔上疏下

陳正獻公行狀純熙五年五月改判建康府詔赴闕奏事因語及人材問公識某人否對曰臣素知之今日正當得此等人布之朝列則所謂猛虎在山藜藿不採後黠在朝淮南寢謀者也願陛下留意上爲沈思久之。○又云公好賢之心實篤於內一時人材薦達甚衆然皆不以語人如某之不肯公前後蓋嘗三薦之而赴建康時對語尤切。

所按赴建康時所薦對語尤切者卽所謂猛虎在山云云也。

王白田云。嫌於自贊而隱之。故稱某人。是也。此正獻公第二
次薦朱子也。

年譜純熙八年三月。除提舉江西常平鹽場。

朱子與陳師中

正獻公之子

書云。某試郡無狀。以丞相庇臨之力。幸

及終更。復叨除命。傳聞嘗污丞相薦墨。是以有此。歸見劉平甫。
乃知所以假借稱道者。過實殊甚。使人愧懼。踧踖不知所言。

所按此正獻公第三次薦朱子也。朱子當日之出處。關吾道
之盛衰。排之擠之者固多。而薦之者亦復不少。然至於再。至
於三。勸懇懇歷久而不倦。非好賢之篤。其何能若是哉。又

攷朱子知南康軍時。正獻公爲江南東路安撫使。朱子一切救荒諸政。如搬運他州米穀振糶求免。漕司催發舊欠求免赦恩所放官物。求於上供數內分豁。去年所放旱米。乞撥給錢米脩造石寨。從漕司借留六年上供零米。約束上流遏糶等事。皆有劄子達正獻公。其後行之無所窒礙者。皆正獻公之力居多也。

記汪文定公奏狀

汪文定公應辰集中有除敷文閣待制。舉朱某自代狀。其詞曰。準令諸侍從官受訖。三日內。舉官一員自代者。右臣伏覩左迪

功郎監潭州南嶽廟朱某志尚宏遠學識純正不守章句而以自得爲本不事華藻而以躬行爲用尊其所聞充養益厚舉以代臣實允公議所按此事不見於年譜行狀竊謹識之以見文定好賢之誠舉士之美焉。狀中不守章句而以自得爲本其形容朱子尚未的確。

記林黃中唐說齋二事

宋南渡乾純之間人材極盛而浙閩爲最宏通博雅之士指不勝屈其有著書滿家洽聞禪見一爲勅朱子之林黃中與一爲朱子所劾之唐說齋仲友二人者固皆自命不凡者也黃中不

信邵子之易猶可言也。至謂六畫之卦爲太極。中合二體爲兩儀。又取二互卦通爲四象。又顛倒看二體及互體通爲八卦。故一卦皆含八卦。謂之八象。其前四卦以兩正體兼兩互體。其後四卦以兩反對兼兩互體。生之之義寓於包之之中。穿鑿甚矣。黃中不信西銘。猶可言也。至以乾父坤母。非易之本義。塞吾其體。帥吾其性。舍氣言體。舍志言性。非孟子之本義。父母可降爲宗子。宗子可升爲父母。爲易位亂倫。名教之大賊。則於西銘之文義。尚未十分領會。何論其他。黃中有周易集解三十六卷。崑山徐尚書刻通志堂經解。已梓而復毀其板。則是非之心猶存。

於六百載以後矣。唐說齋自六經解而下，共三百六十卷。文集四十卷，今皆不存，僅存數條於王伯厚困學紀聞中而已。黃中立朝，頗著風節，其子行知亦有文名，故其書尚流傳於世。說齋盤盥不飭，而其子復不肖，一時諸老無復齒及之者，故其著述皆不傳。黃中以講論不合之故，至以道學之僞糾朱子，說齋被台州士民遮控，列之彈章，遂聯絡陳賈鄭丙以僞學詆朱子，致啟慶元黨人之禍。士類爲之一空，其臯皆有不勝誅者。嗟乎！讀書稽古，本欲親師取友以成其德，行道濟民以達其學。今黃中之妒賢嫉能，說齋之貪賄病民，如此，則反不如不讀書者之猶。

有所顧忌也。雖箸書滿家，何益哉。

記葉正則通論林栗封事

葉正則論林栗封事，頗獲一時盛名。今按封事中有云：朱某素有文學行義，居官所至有績，既以常人之賢者擬朱子，而又云逐去一某，固未甚害，則直視大賢之進退，爲無足重輕矣。詔錄又載陳君舉有朱某素來迂濶，臣所不取之語。永嘉學術不能辨別賢否如此。

記慶元三年僞學逆黨籍

朱子提舉浙東常平鹽茶時，因劾唐仲友，得罪於宰相王淮，於

是陳賈鄭丙先後攻道學。林栗因之顯斥朱子。而道學之目遂爲世所指名矣。後劉德脩奏論道學非程氏之私言。及韓侂胄專政。召何澹爲御史。改道學爲專門之學。蓋祖紹興時汪勃。何若曹錫之故智也。後又以專門之學不足肆其誣詆。於是劉德秀論留正引僞學之徒以危社稷。胡紘論僞學猖獗圖爲不軌。慶元初年。奸媚之徒。無人不痛詆僞學。始猶不敢誦言姓名。至沈繼祖之章。無所忌憚。而朱子落職矣。劉三傑又以僞學僞黨獲罪。尚輕。對言前日僞黨變爲逆黨。侂胄大喜。卽日除三傑右正言。知綿州王浚遂上疏乞置僞學之籍。於是僞學逆黨著籍。

者。宰執四人。右丞相趙汝愚。少保觀文殿大學士留正。潭州帥
王藺。少傅觀文殿大學士周必大。待制以上十三人。煥章閣待
制朱某。知臨安府徐誼。吏部侍郎彭龜年。中書舍人陳傅良。戶
部侍郎薛叔似。兵部侍郎章穎。刑部侍郎鄭湜。吏部尚書樓鑰。
吏部侍郎林大中。禮部尚書黃由。兵部侍郎黃黼。禮部侍郎何
異。吏部侍郎孫逢吉。餘官三十一人。起居郎劉光祖。太府寺丞
呂祖儉。太府卿葉隨。秘書郎楊方。校書郎項安世。校書郎李璠。
起居郎沈有開。知穎州曾三聘。軍器監簿游仲鴻。監察御史吳
獵。祭酒李祥。國子博士楊簡。監左藏庫趙汝謙。侍御史趙汝

談校書郎陳峴著作郎范仲樞司業任道國子博士孫元卿大學博士夷變國子正陳武宗正丞田謩右正言黃度太府卿張體仁福建提舉蔡幼學浙西提舉黃灝池州教授周南嘉興教授吳柔勝江東提刑王厚之知湖州孟浩知揚州趙羣成都通判白炎震武臣三人池州都統皇甫斌知金州范仲任江西兵馬鈐轄張致遠士人八人太學生楊宏中周端朝張衡林中麟蔣仲宋史作傳徐範處士蔡元定呂祖泰共五十有九人見宋李氏心傳道命錄攷宋史有傳者三十五人餘二十四人軼事往往見於他傳皆一時之賢人君子也迨乎黨禁既弛諸賢存者稍稍起用惟

葉仲則於侂冑用兵之初。不能力阻。薛象先嬖。要晚節。未免不
滿人意。其他如黃文叔之知建康。活饑民百萬口。周南仲之召
試館職。力詆權要。林和叔之請誅侂冑。及旌吳呂祖儉。彭龜年
之忠直。皆卓然可與日月爭光也。

書宋史倪思傳後

倪文節公立朝梗概。見於宋史者甚偉。惟朱子年譜載省闈知
貢舉葉薦倪偁。道命錄作思。與本傳同。劉德秀奏請文弊復言

宋史選舉志亦作偁。

僞學之魁。以匹夫竊人主之柄。鼓動天下。故文風未能丕變。乞
將諸錄之類。並行除毀。是科取士。稍涉義理者。悉見黜落。六經

語孟中庸大學之書爲世大禁云云似文節與葉翥劉德秀皆韓侂冑之黨攷侂冑傳云吏部尚書葉翥邀侍郎倪思列疏論僞學思不從侂冑乃擢翥執政而免思官是文節明明與翥相反非翥類也按文節本傳光宗末出知紹興府茂陵卽位召除吏部侍郎兼直學士院御史姚愈劾之出知太平州茂陵本紀慶元二年夏五月辛卯賜禮部進士鄒應龍以下四百九十九人及第出身宋制進士秋取解冬集禮部春考試夏御試賜及第出身是葉翥知貢舉文節與劉德秀同知貢舉

宋制知貢舉一人同知貢舉

人舉二
係二年之春侂冑傳敘葉翥邀文節論僞學在趙汝愚暴

薨之下。

汝愚正月庚子卒於永州。

則卽二年春同知貢舉之時。非有二也。文

節不從而免官。卽本傳統愈劾之。出補太平州也。葉翥擢執政。卽慶元二年夏四月。以葉翥簽書樞密院事也。劾文節之姚愈。卽論姦偽之徒。盜名欺世。乞定國是者也。文節如果與葉翥劉德秀同論偽學。卽與姚愈同爲侂冑之黨。何至姚愈猶劾文節。又何至葉翥擢執政。劉德秀遷諫議大夫。而文節反出知太平州乎。後侂冑用兵之時。復起文節。而文節始終不爲侂冑所屈。其立朝梗概可知矣。然則省闈之論偽學。乃葉翥劉德秀爲之。文節實不與焉。徒以同知貢舉。遂牽連而廢斯玷耳。幸本傳及

倪冑傳猶可攷見故反覆核辨之如此嗚呼朱子年譜多後人附益不盡李果齋原本而精博如李秀巖其作道命錄亦平列三人而無所區別何倪文節之不幸也

胡紘不當在弟子之列說

自古彎射羿之弓者何代無之而程門之邢恕朱門之胡紘尤爲世所指名按邢恕始學於伊川後自磁州見明道復從之遊明道之歿恕所敘說伊川取而次之於行狀之後其爲程門之弟子何疑若胡紘者宋史但稱其未達時嘗謁朱某於建安某待學者惟脫粟飯遇紘不能異也紘不悅語人曰此非人情隻

雞尊酒山中未爲乏也。遂亡去。未嘗明言其爲弟子。夫以隻雞尊酒相責。是絃固明明以客禮自居矣。卽云絃先有執業之志。然亦旣亡去。則與畔將逃卒無異。早已別籍於建安之門。安得尚謂之弟子哉。乃考亭淵源錄引宋史本傳。於嘗謁朱某下。增受學門下四字。殊失其實。彼傳伯壽者。以故家子。嘗執弟子禮見於行狀。又非胡絃比也。

及門婺源胡紹實校字

述朱質疑卷之十六

當塗夏忻心伯書

朱子廬墓寒泉攷

乾道庚寅正月朱子葬其母於後山天湖之寒泉塢因築室
寒泉讀書其間小祥之後諸生就之講習遂攜二子同往并
招蔡季通課之後旣免喪益加修葺往來讀書不輟名之曰
寒泉精舍茲攷其約略著於篇

年譜庚寅春正月葬祝孺人於寒泉塢日居墓側旦望則歸奠
几筵

王氏懋竑攷異云年譜李洪閬三本皆云日居墓側而不言何所寒泉精舍當與墓相近然以精舍名則是講論之地而非守墓之所朱子庚寅與范伯崇書云比攜二子過寒泉招季通來相聚亦有一二友朋初不廢講論則朱子固嘗至寒泉與朋友講論而謂日居墓側朔望方歸奠几筵恐未然也今削去而增見於此

析按年譜此條必李果齋原本後人斷不能憑空增益朱子本不居廬墓之名寒泉亦本無精舍之目但築室墓旁旣便朝夕攀號亦可溫習舊業古人居喪無不讀書且亦不僅喪

禮祭禮況旣虞卒哭乎孔子葬防孟子葬魯反齊皆有門人問荅之事是亦未嘗盡遺生徒參泉去建陽二十里平時則守墓講習朔望則歸奠八筵正朱子因時斟酌居喪盡禮之實王白田不信年譜一筆鉤刪又以荅伯崇書爲庚寅辨見下末復引溫公書儀禮記開元禮諸書若深不滿意於朱子之居喪者噫嘻奇矣

庚寅程允夫與朱子書云聞近已襄大事遂廬墓側凡兄所行皆古人事不可及也

朱程
答問

所按此朱子廬墓之的證可知年譜之非妄語朱子至德純

孝廬墓一節不足以重朱子故勉齋行狀不載而果齋年譜載之者紀其實也

庚寅與林擇之書云某憂苦如昨至節

謂冬至節

復不遠痛割不自

堪幸朋友不鄙棄責以講習怱怱度日且復支持耳擴之來此

指塞泉

相聚極有益元履適過此云得其子九月來書南軒求去

不獲數日甚撓此極知其必然不知渠又何以處之

析按張南軒庚寅自嚴州入朝辛卯五月去國此敘魏元履子九月來書求去不獲云云則是書爲庚寅之十一月朱子已逾小祥矣

辛卯荅范伯崇書云比攜二子過寒泉招李通來相聚更有一
二朋友來相聚初不廢講論又云知老兄官守不苟又得賢守
相聽從得以稍伸已志但久畱郡中於簿領之責竊恐曠弛亦
似未便又未一條云欽夫得行所學吾道之幸但此事大難不
可喜而可懼近復如何得正月書亦未有異聞也

斡按此辛卯書也范伯崇爲廬陵屬邑主簿在朱子丁母艱

以後已丑庚寅之間

荅伯崇書云須送行語哀苦中不能爲文

其奏取以代錄事

名其堂曰盡心朱子爲之作記在癸巳二月此荅書時尙爲
主簿則癸巳以前也張欽夫庚寅召還未及期歲召對六七

次辛卯夏五月以論張說與時相虞允文不合出知袁州去國此云欽夫得行所學又云得正月書得行所學指召還爲講官所得正月之書則爲辛卯無疑也

又按合上二書攷之則朱子之攜二子招季通及有一二朋

友講習寒泉皆小祥以後事也

庚寅九月小祥

與蔡季通書云此只八九間下寒泉十一二間足望臨顧也

賴集

所按此招季通書也此只八九間疑朱子墓側之屋下寒泉十一二間疑寒泉之下別有十一二間可以居季通及來學者足望臨顧專指下寒泉而言未知是否

又與蔡季通書云還家半月節中哀痛不自勝兩兒久欲遣去因循至今今某亦欲過寒泉矣謹令詣左右告便令人學勿令遊嬉廢業又云錢物已令攜去一千足米俟到后山遣致或彼價廉卽寄錢去煩爲糴也

所按上二首年月不可攷朱子招季通課其二子此其證也書末所云后山卽壙記後山天湖之陽寒泉塢之所在也又按以上諸書皆稱寒泉並無精舍之名

辛卯與林擇之書云某哀苦之慘秋來增劇顧念日月易得而音容邈然發於夢寐尤痛切不能堪也此間諸人相聚自五月

以後季通大病無甚倫理南軒竟不免去國道之難行如此可歎可歎

斠按南軒去國及秋來增劇云云則此書爲辛卯之秋朱子已大祥矣是年冬朱子釋服以後遂常爲講習之所

近思錄序云純熙乙未之夏東萊呂伯恭來自東陽過予寒泉精舍

斠按精舍之名始於此以前但說寒泉不名精舍也

記朱子屢請祠祿

宋世祠祿之制最爲忠厚雖創自王荊公不得因其人而議之

也語類云本朝先未有祠祿但有主管某宮某觀公事者皆大

臣帶之真箇是主管某宮某觀御容之屬

所按宋自景德四年安奉太祖御容奉天

禪院其後皇祐間安奉太祖御容於滁州太宗御容於并州真宗御容於澶州凡中外宮觀寺廟皆安奉御容其他多

只是監當差遣雖嘗爲諫議官亦有爲監當者如監鹽茶酒務

之屬自王介甫更新法慮天下士大夫議論不合欲一切彈擊

罷黜又恐駭物論於是創爲宮觀祠祿以待新法異議之人惟

監司郡守以上眷禮優渥者方得之自郡守以下則盡送部中

與監當差遣後來漸輕今則又輕皆可以得之矣所按朱子在

浙東有乞許令佐自陳嶽廟狀在長沙劾將官陸景任乞與宮

觀差遣所謂後來漸輕。今則又輕是也。朱子幼孤。韋齋歿時。無寸椽尺土之庇。依建安劉氏以居。二十四歲。始薄同安。浮沈未秩者數載。歸卽杜門食貧。不仕者二十年。每朝廷授官進秩。稍不以道。便辭謝退避。其所以養親讀書者。惟恃朝廷之祠祿耳。此區區祠祿。在廊廟有養賢之恩。在朱子無傷廉之取。而畸學之士。反從而議之。孟子曰。如使予欲富。辭十萬而受萬。是爲欲富乎。朱子之與孟子。其揆一也。

跋朱程荅問

朱子雖居建安。然遷自新安。甫再世耳。讀名堂室一記。其眷念

故鄉之意，懇懇諄切，溢於楮墨之外。程允夫先生者，朱子之內弟也。與朱子往來書札，後人輯之，至四十餘首之多。大抵以伊洛之學相勸勉，而深以縱橫馳騫之士爲戒。虞道園曾跋家問一帖，所謂片言隻詞，皆足觀感是也。所按朱子於故鄉後進，屬望真摯，豈僅允夫一人哉？觀其與汪伯虞注太初、滕德粹、汪叔耕、祝直清、程傳之、汪會之、汪次山諸書，無不以切已之學勸勉告誡。札中敘及鄉井，有云：「先世流落閩中，未嘗一日而忘父母之邦。」答汪太初有云：「自先世已去鄉井，中間纔得一歸，今又二十餘年，所論爲學之意，正區區所望於鄉人者。」答滕德粹有云：「某於足下」

爲同郡人彼此未得一面

荅程傳之

有云每欲推之以語同志而求

其輔仁之功今乃得吾會之於中表間豈不幸甚

荅汪會之情詞惻

怛所謂樂樂其所自生禮不忘其本也今朱子之祀享遍海內而精神陟降尤當戀戀於紫陽星渚之間學者幸生文公闕里則桑梓先賢尤宜效法宜何如講明切究厲德脩行以無愧東南鄒魯之稱乎

慶元二年丙辰九月朱子無主講新安郡城攷

朱子自閩如婺源省墓者再一爲紹興庚午

朱子二十一歲

一爲純熙

丙申

四十七歲

見於年譜及諸葛泰所撰紫陽書院記甚詳乃明汪

六符著新安學會錄載慶元二年朱子六十七歲九月大會於郡城山

房主教晦庵朱夫子鄉先生受學者幾三十人學行最著者十

有八人婺源李明齋季札聯溪齋璘策齋洪德玉邱程允夫洵及從子翠林樓汪湛仲清卿季英端雄欽則祝和甫穆

並弟癸吳友堂昶程士華實之休邑則程東隱先及子格齋永奇汪方壺華汪太和楚材許衡父文蔚祁門則謝公玉璣未

又載朱子荅問凡十四條自謂出朱子紀實及南溪書院志未

之有攷也汪星溪佑旣以學會錄爲裝點成篇見天啟辛酉會試籍跋詳具施

氏璜所脩紫陽書院志其作書院建遷源流記猶首敘丙辰會講之事不

亦惑乎施誠齋璜知十四條爲良知之學而演刪去不載而又

敘此事於會講卷端且於年譜增入丙辰九月如婺源省墓會

講郡城一條。又於趙師雄傳中敘入朱子以慶元二年歸省墓。主教郡城山房。公從至郡云云。是二公固皆以郡城會講之事爲不謬也。江脊脩永證以新建程氏譜。不載實之會講之事。固不足爲據。卽謂允夫官廬陵。在沈繼祖十二月攻擊僞學之先。攷之亦未能詳盡也。按大全集載朱子慶元二年九月丁丑。跋東陽郭德輔行狀云。東陽郭君將葬其子。俱不遠數百里。過予於建溪之上。請銘。又慶元二年十月丙午。跋許侍郎詩卷云。侍郎許公之孫。建陽丞公。示某以公手書詩卷。是此年九月十月。朱子皆在建陽。何緣有新安會講之事。其證一也。又慶元二年

十一月乙巳朱子祭程允夫文云此月之初得吾弟九月六日書不聞有所疾痛及二十九日曾君無疑使以書來乃言吾弟比以此月八日不幸下世是允夫卒於十一月初八日其九月六日猶作書寄朱子何得有相從會講之事其證二也方虛谷回撰程東隱先生墓表云朱子掃墓歸婺源先生擔簦見之年已七十餘不能追隨人間遣其次子承奇侍歸建安葉秀發程格齋先生墓誌云文公省墓婺源君之父東隱先生挈君往謁因令君侍歸建安踰年而返東隱先生晚得痺病君孝養備至按純熙丙申朱子再至婺源至慶元丙辰二十一年矣斯時東

隱已九十餘歲其存歿不可知

俟得東隱行狀再考

卽幸而猶存以九十

餘歲兼患痺病之老翁猶挈其子來郡會講此於情事實難憑信其證三也以此三證求之而學會錄之不足信明矣

韋齋墓未嘗再遷攷

世傳朱子再遷父墓細攷之實未然也文集中載遷墓誌云府君將歿欲葬崇安之五夫卒之明年遂窆其里某幼未更事卜地不詳旣懼體鬼之不安乃以乾道六年七月五日遷於里之白水鵝子峰下且將請文作者以表其隧又祝孺人壙誌云乾道五年九月戊子卒明年正月癸酉葬於建陽縣後山東北距

先君白水之兆。百里而遠。是遷墓卜六年之七月。祝孺人之葬。尚在正月。記中白水之兆。仍是預言之也。又慶元五年十二月。作行狀云。公卒之明年。某奉其柩葬於崇安縣五夫里。而碩人別葬於建陽縣崇泰里。然公所葬地勢卑濕。懼非久計。乃卜以慶元某年月日奉而遷於上梅里。寂歷山。蓋公之詩。嘗有鄉關落日蒼茫外。尊酒寒花寂歷中之句。此豈其識耶。周益公神道碑與之同。據此。則韋齋之墓。實由五夫里遷寂歷山。未嘗自鵝子峰遷寂歷山也。又告考妣文云。某孤露垂六十年。不能考次先君行實。以表於墓。雖實有待而罪無可逃。逮今晚暮。衰病侵

加改卜之謀始有定議乃撰成行狀一通將以請銘於故相退
傳益國周公云云是作行狀後告考妣之文云逮今晚暮改卜
之謀始有定議則前此實未改卜可知矣又遷居告家廟文云
某罪戾不天幼失所怙祇承遺命往依諸劉卜葬卜居亦旣累
歲時移事改存沒未安乃眷此鄉實亦皇考所嘗愛賞而欲卜
居之地今旣定宅敢伸虔告云云按紹熙三年朱子年六十三
歲始築室於建陽之考亭自韋齋歿後依劉少傅兄弟居五夫
里葬亦在五夫里故云往依諸劉卜葬卜居亦旣累歲也自乾
道六年至紹熙三年凡二十三年旣云卜葬卜居亦旣累歲又

云時移事改存沒未安則中間無白水之遷可知蓋五夫之葬
乃韋齋遺命後因地勢卑濕是以別葬祝孺人而不敢合墓白
水之下雖撰有遷墓記實欲遷而未遷後因寂歷山之兆有符
詩句遂定而改葬今其墓猶巍然存焉者是也朱子卒後片紙
隻字門人不敢失墜遷墓記偶未削稿是以亦得存於文集致
啟後人之疑幸有行狀告考妣文及遷居告廟文可證得以論
其迹焉嗚呼朱子自幼失怙孺慕終身稟學於籍溪諸君考道
於延平遺老書佩韋於門帖卜考亭而遷居無非仰成先志始
也葬於五夫本韋齋之所欲及因卑濕而欲改兆存之終身慎

而又慎白水之下。依然中止。至寂歷之遷。仍取決於厥考之遺。詩而朱子年已七十矣。其孝思之肫摯如此。後人每以屢遷父墓。妄肆疑詆。烏知朱子之心哉。

又按遷墓記云。且將請文作者以表其隧。後因不果遷。遂不句人作文。及慶元五年。定遷寂歷。始求周益公作神道碑。亦其一證。

跋茶院朱氏世譜序

此序不見於文集。然朱氏世藏之。序畧云。某聞之先君子太史吏部府君曰。吾家先世居歙州歙縣之黃墩。相傳望出吳郡。秋

祭率用魚鼈唐天祐中陶雅爲歙州刺史初克婺源乃命吾祖
領兵三千戍之是爲制置茶院府君又引舊譜云奉使公聘遊
集目云按奉使公名弁章
齋先生之從叔父系出金陵蓋唐孝友先生之後考之

唐書孝友先生諱仁軌自爲丹陽朱氏而居亳州永城以孝友
世被旌賞一門方閭相望而非吳郡之族奉使公作先吏部詩
又云迢迢建鄴水高臺下鳳凰鼻祖有坟墓於今草樹荒不知
其何所指也所按朱子著書多自署新安以示不忘本之意然
紹興丙子家藏石刻序慶元乙卯跋李參仲行狀則皆自署吳
郡朱某純熙乙巳跋范文正公送寶君詩自署同郡朱某所謂

相傳望出吳郡也。純熙辛丑，跋鄭景元簡。紹熙庚戌，跋蔡端明獻壽儀。跋曾文昭公與朱給事帖。紹熙辛亥，跋葉氏慕堂記。俱自署丹陽朱某。所謂孝友先生自爲丹陽朱氏也。記云：樂樂其所自生，禮不忘其本。學者但知朱子自稱新安，而不知間有稱丹陽吳郡者。因讀茶院世譜序而識之。

跋虞集復田記

復田記畧曰：吏部之來閩，質其先業百畝以爲資。同鄉張公敦頤教授於劍，請爲贖之。計十年之久，可以當其直。而後以田歸朱氏。癸亥，吏部歿。張公以書慰文公於喪次，而歸田焉。庚午，公

省墓於婺源。以其租入充省掃祭祀之用。按張公教授於劄。是亦貧士。豈能代贖百畝之產。想其時適有餘贏。可贖此產。計十年之入足當其直。而後歸田。則已既不失其直。而韋齋先人之產亦還。其委曲求全。古人交誼之篤如此。王白田則云。此事於文集語錄皆無所攷。不知虞何所據。所竊謂朱子之事。不見於文集語錄者亦多矣。虞在元末。去朱子之世已百有餘年。豈能鑿空撰出。余嘗詢之福堂博士。此田現存大祠中。其確有憑據如此。又張先生所居縣之游汀。子姓甚繁。世有奉祀生。由學中詳請承襲。蓋先賢之澤長矣。

朱獻靖公不歸婺源私說

朱獻靖公韋齋先生作尉政和奉其父承事君至聞宣和七年

承事君卒遂葬於政和而不復歸婺源年譜注以爲因方臘亂

睦不能歸固已失之

方臘之亂宣和三年已平辨見府志朱子世家注

遷墓記以爲貧

不能歸自是當日實事然以所妄測韋齋之意仍不盡在於是

而別有深微之見存乎其間朱子雖微知之而韋齋未嘗明言

則亦未便遽以是見諸行狀也蓋北宋之末伊洛二程子之學

甫行於東南然宣歙間絕無傳者惟將樂楊文靖公龜山親得

伊洛傳授載道而南一傳而爲劍浦羅文質公豫章再傳而爲

李先生延平。韋齋以豫章爲師。以延平爲友。又得浦城蕭公子

莊而與之遊。至於籍溪胡公。艸堂屏山兩劉公。皆學有淵源。

籍溪

艸堂皆傳河南之學。屏山與二公講學。見朱子屏山墓表。相與切磋琢磨。以成其德。承事君

之卒。韋齋年未三十。銳意欲得道統之傳。故留閩不歸。浮沉卑

秩。以便師友之親炙。觀其撰承事君行狀云。或勸事生業。曰。外

物浮雲耳。獨見其子從賢師友遊。則喜見顏色。所謂賢師友者。

意卽指豫章。延平子莊諸先生言也。韋齋仰承承事君之志。以

克終所學。庶幾曾子之養志歟。其時朱子猶未生。及紹興四年。

丁程孺人內艱。朱子生已五歲矣。朱子四歲時。嘗指日問韋齋。

曰日何所附曰附於天又問天何所附韋齋異之於是任道之志益之以傳道之心遂亦葬程孺人於政和而永爲建人後朱子卒事延平而傳二程之學爲世儒宗皆韋齋之家閭有以啟之也朱子撰獻靖公行狀云志道服膺死而後已垂裕後人不使迷於所向其立言之旨微矣嗚呼聖賢之孝以能傳道統爲重不徒以能歸故里爲重孝經說孝之終必曰立身行道揚名於後世以顯父母中庸數舜之孝首以德爲聖人推之宗廟饗之子孫保之若韋齋者庶幾孔子之所稱歟世於韋齋不歸新安多異說

明張氏芹又謂樂其建安山水之勝因家焉

故私爲之說而論之如此以

俟後之君子質焉。

新安理學自朱子再至婺源始有傳人說

濂洛之學自朱子以前不傳於宣歙。朱子十九歲登第二十一歲至婺源省墓。其時學未成。德未尊。鄉里空有從之者。程允夫洵爲朱子內弟。年甫十四。朱子拜其父韓溪翁而見之。僅貽書論詩而已。及純熙三年丙申。朱子四十七歲。學成德茂。蔚爲儒宗。再至婺源省墓。鄉人興起而從遊者甚多。婺源則滕溪齋象齋兄弟。漢齋名璘。蒙齋名珙。奉其父南夫先生之命。先一年通書求教於朱子。純熙三年。朱子歸。執弟子禮受業。有溪齋類稿蒙齋集行世。珙又有朱子經濟文衡前後續三集。汪子卿情卿兄弟。子卿字廷佑。清卿字湛仲。兄弟。

俱力學清卿曾以魯論言仁及五常之性質疑於朱子兩致復書
嘉熙三年朱子自閩歸寓清卿家嘉其孝扁其書室曰愛日

李明齋季札

文公歸省墓季札師之所著有明齋蛙見錄仁說近思續錄家塾紀聞諸書朱子語類十六卷季札

所叙則吳友堂昶

丙申朱子掃墓歸率先執經館下獲聞伊洛至論偽學黨作徒步走寒泉精舍得朱子親

筆四書注疏以歸所著有易論書說史評詩文集等編

海陽則程傳之次卿父子

傳之名先次卿

名永奇先是傳之通書於朱子及丙申旋里傳之挈子往見傳

之年已七十餘遣永奇侍歸建陽踰年而返次卿有朱子語粹

中和考格

皆極一時之選其餘不可考者尙多歷宋末元明代

耆稿等編

多名儒新安之號比於鄒魯皆足以衍考亭之緒紹濂洛之傳

而實則丙申再至有以啟之也大賢桑梓之鄉過化之地何其

盛與然其時朱子著述多未成西銘太極諸解尙未宣示學徒

論孟集注學庸章句皆成於丙申以後至紹熙元年始刻於漳州今朱子之書巨帙細編家絃戶誦苟能講明玩索而責其身以必行焉又何前賢之不可企而朱子之不可學哉雖無文王猶興是所望於生文公之鄉者

擬朱子荅王雙溪

炎

論諒闇開講書

王雙溪先生文集有與朱子論諒闇開講書而大全集中無荅書程氏敏政曰世傳雙溪與文公不合未見所出豈卽謂是耶所按雙溪此書敷演古義持論甚正且書詞謙抑朱子不容不荅豈荅之而偶軼耶仿東哲補亡之意擬一通補之

雖筆力萎弱不能希文公之萬一或於當日開講之意稍窺
見一斑云

惠書陳義甚古臨風三復安敢默然竊以爲天子之孝與常人
異後代之天子與前代之天子異卽前代之天子遭遇非常而
禮亦不能一致況茲者壽皇大行太上皇病不能執喪今上以
嫡孫承重其所以膺付託之重盡感格之誠者尤非哭泣擗踊
區區講明於斂奠虞祔之節文已也我朝最重經筵之典祖宗
之成法可師元祐之故事可攷請一一爲足下陳之閒傳所謂
斬衰唯而不對雜記所謂三年之喪言而不語者皆爲常人言

之若喪服四制所謂三年之喪君不言書所謂高宗諒闇三年不言孔子所謂何必高宗古之人皆然者皆百官備百物具天子及守土之制非言而后事行身自執事而后行者所能比也後世人主有以日易月者矣有三日五日二十七日後聽政者矣天位至重軍國事至鉅大臣非皆元德之良烏能一以古禮概之商書紀伊訓周書紀顧命阿衡太保之賢豈不明天子諒闇之制而長言誥誡既非所以仰體嗣王不言之隱且與臣下言不文之旨大相乖戾何與蓋成湯既歿外丙仲壬立二年四年而嚳天步艱難國家多難阿衡忠愛之忱發於中之不能自

已召公懲武庚之禍故於康王正位之始鄭重以曉示天下而康王之誓諸侯委曲詳明亦大非古者不言之例此皆時與勢爲之雖三代之君臣不能以一致者也自古帝王之學無不由致知格物入者而物則民彝之訓具存於經故聖帝明王必隆重師傅敷求經訓以涵養其德書缺有間不能多徵若大戴禮武王踐阼受師尙父之丹書乃經筵之權輿也後漢宣帝之講石渠章帝之講白虎唐元宗之命馬懷素褚無量更日侍讀尙有古意我朝太祖建隆三年召宗丞趙孚講易開寶三年召王昭素講乾卦仁宗英宗踵而行之且於諒闇開講而尤莫盛於

哲宗之朝。斯時太皇太后以神母聽政。司馬光、呂公著皆一時大賢。起伊川程先生爲說書。於是元祐之治。稱極盛焉。考神宗崩於元豐八年三月。甫踰月。卽自揚州召呂公著爲侍讀。十二月。開經筵。講魯論。讀三朝寶訓。乙亥。詔執政侍臣講讀。及元祐元年三月。程先生至闕。其講益勤而精。彼溫國諸賢。豈不識諒闇。開講前古未之聞乎。良以親師重道。養成君德。本朝之家法。固如是也。今上富於春秋。代太上皇執喪嗣位。壽皇豐功大業。續承至重。太皇太后及大上皇兩宮之間。盡誠盡孝。非特楷範宇宙。且將傳之萬世。休美無窮。豈讀一二卷喪祭之禮。能收其

效哉丞相宗臣謨謀密勿擇日開講侍讀黃公文叔侍郎彭公
千壽中書陳公君舉皆以端人正士碩德老成極經筵之選此
千載一時似不得以開講清閑有妨哀慕爲疑也某以疏遠藩
臣誤蒙天恩召赴闕下且畀以待制侍講美職力小任重已拜
疏固辭不敢冒進年譜八月除煥章閣待制兼侍講辭不允九月再辭然必謂諒闇不當
開講則某未之敢聞也

附王雙溪與朱子書

炎近讀邸報伏見八月八日指揮增置講讀官

所按八日係六日之訛宋史紹

熙五年八月己丑朔甲午增置講讀官以給事中黃裳且於中
中書舍人陳傅良彭龜年等爲之己丑至甲午實六日

旬擇日開講。

所按壬寅詔經筵官開陳經旨。改正關失。壬寅係八月十四日。

夫始初清明崇尙

儒術以輔聖德。此固帝王之盛美。然擇日開講。則炎竊有疑焉。且三年之喪。三代之達禮也。二十七日而公除。後世之權制也。其意若曰。軍國之事。不可以不公。自聽斷。則公除而聽政。亦勢不得已焉。爾服釋於外。哀存於內。則禮之節文雖變。而禮之情實未泯也。古禮不復。可見其詳矣。記曰。斬衰唯而不對。齊衰對而不言。大功言而不議。夫大功之視衰麻。其情有降殺。故服有等差。而記又謂大功廢業。又曰大功誦可也。可以誦。不可以議。況衰麻之至戚乎。居喪未葬。讀喪禮。旣葬。讀祭禮。左右講讀之。

官以備顧問喪祭之禮欲得其詳每事問可也一日萬幾不得已而親事於法官之內聽斷有疑時以訪焉可也大行至尊壽皇梓宮在殯復土未有定期而開講於清閒之燕炎爲是有疑焉三代之禮固無可攷漢唐之事亦不足證不識祖宗典故有是乎炎晚生所按雙溪生於紹興八年小朱子六歲何足以識禮然待制鄉邦之先進後學宗之且處經幃之長炎爲是有請焉乞賜垂教以開所疑

祝和甫易簪辨不可信說

朱子易簪時事以蔡九峰先生夢奠記爲最詳且核蓋朱子

卒於慶元庚申三月初九日。九峰以初二日晚卽至考亭時諸生在滄洲精舍。惟九峰宿樓下書院。朝夕密邇朱子。故所見最真。至於年譜行狀之作。皆係追記之筆。不如九峰之一得自目睹者。爲有據也。乃祝和甫穆藝文類聚有朱子易簪辨一篇。忽生異議。謂年譜紀載失實。於是後人添纂年譜者。改從祝氏。與夢奠記不合。和甫雜博之學。文章之士。好爲異議。以新人耳目。學者信祝氏。何如其信九峰也。茲詳說之列於左。

夢奠記云。初八日癸亥。精舍諸生來問疾。諸生退。先生作范伯

崇念德書托寫禮書且爲冢孫擇配又作黃直卿幹書令收拾
禮書底本補葺成之又作敬之在書令早歸收拾文字且歎息
言許多年父子乃不及相見也夜分令沈檢果氏病源初九日
午刻逝

易簣辨云先生疾革惟仲子監酒公侍次子侍郎公時方調官
中都先生首索紙筆作季子書與之訣別次作勉齋黃公書又
其次欲作通守范公書則手弱不能運筆亟命仲子代書尙力
疾塗竄一二字皆拳拳以編輯禮書爲屬纔扶就枕奄然而逝
今年譜所書乃謂先作黃范二書而後作季子書

按祝所見年譜與夢奠記

同而稍異者黃范次第今所行年譜則其事失倫何以垂範昔皆先季子而後黃范則從祝氏改矣第五倫視兄子及已子且不能無別曾謂先生治命而顛倒其親疎之序乎竊謂行狀所紀先後已得其實固不當復爲異同也。

析按祝氏此辨其謬有三朱子作書在初八日易簀在初九日事隔一日夢奠記年譜行狀皆同而祝氏謂作書畢纔扶就枕而逝此其謬一也作書次第朱子本無成心意之所及卽便爲之有何親疎之序而妄引第五倫事以逞辨擬不於倫此其謬二也謂范伯崇書非朱子自作乃文之代書九峰

是時在旁不容不見而無一語及之此其謬三也至於勉齋行狀所云手爲書屬其子在與門人范念德黃幹尤拳拳以勉學及修正遺書爲言者朱子與勉齋書云人還知己至三山又知授學次第人益信向凡百更宜勉力此行狀所謂勉學也又云禮書並望參攷條例以次修成此行狀所謂修正遺書也二事皆勉齋自道故以作已書居後已與念德皆門人故又先念德而以門人貫之別出與敬之書故曰屬其子在與門人云云此則其行文之法當如是非代朱子爲親疎之別也若如易簣辨所云則黃書在第二范書在第三行狀

所述仍不得其實。不亦自相矛盾乎。

夢奠記云先生午初刻逝。是日大風破屋。左右梧桐等大木皆拔。未幾洪水。山皆崩陷。其所謂山頽木壞者與。

年譜是日大風拔木。洪水岫山哲人之萎。豈小變哉。

易簣辨云。是歲春先生故宅之前。其山絕頂有數百年合抱之木一株。勢干雲霄。一旦忽爲巨風所拔。夏六月溪流大漲。素所未有。宅前之岫。爲洪濤捲去數百尺。今年譜所書。則謂是日大風拔木。洪流岫岸。二異并見於易簣一日之間。則其事近怪。能無駭聽。竊謂不若改是日爲是歲。則可紀實矣。

所按祝氏此言可謂似是而非矣。夢奠記所云破屋拔木。崩山諸事。卽就朱子所遷居之考亭言之。九峰先生非妄語者。豈有不得之目睹。而爲是誇大之語。且朱子亦何必藉此爲重輕也。祝氏所云故宅。自指五夫里而言。五夫里爲劉氏之宅。朱子旣已遷居。卽與朱子無涉。非婺源韋齋先生之故宅可比。天亦何必示異於五夫乎。昔韓忠獻公之薨。前一夕。大星殞於泊所。陳正獻公之薨。是日地震。明薛文清公之薨。是日雷雨震屋。哲人之萎。彼蒼往往示異。何近怪駭聽之有。婺源江慎齋永修縣志。遂依祝氏改。是日爲是歲。亦可謂惑於

其說矣。

又按以上二條年譜皆本之夢奠記。祝氏非不見夢奠記者。乃不駁蔡氏而駁年譜。豈以蔡氏之言得之目睹。實不可駁。故但駁年譜。使後人不見夢奠記者。相傳以爲紀實之言歟。

增辨行狀年譜

夢奠記云。初九日五更。令沈至臥內。先生坐床上。沈侍立。先生以手挽沈衣令坐。若有所欲言而不言者。平明。精舍諸生來問疾。味道云。先生萬一不諱。禮數用書儀何如。先生搖首。益之云。用儀禮何如。先生復搖首。沈曰。儀禮書儀參用何如。先生首肯。

之然不能言。意欲筆寫示。左右以手版托紙進。先生執筆如平時。然力不能運。少頃置筆就枕。手誤觸巾。目沈正之。諸生退。沈坐枕邊。益之坐足邊。先生上下其視。瞳猶炯然。徐徐開口氣息漸微而逝。

行狀云。翼旦門人侍疾者請教。先生曰。堅苦。按夢奠記云。初入

病先生起坐曰。誤諸君遠來。然道理只是恁地。問溫公喪禮曰。但大家相率下堅苦功夫。行狀屬之初九。似誤。

疎略問儀禮。領之。康熙戊午吳良樞所刻年譜同。紫陽書院中

年譜。閩中所刻年譜。皆同夢奠記。

所按勉齋之行狀。非得之目睹。似不如仲默親身侍疾之確。

仲默明云初九日先生卽不能言可見疎略二字未必出於朱子之口且純用儀禮亦非後世所能行則參用之首月必不誤也

增考改大學誠意章

夢奠記行狀年譜皆云初六日辛酉改大學誠意章

江氏永曰按儀禮經傳通解大學誠意章注與今本同惟經一章注原本一於善今本作必自慊是所改者此三字耳

析按更有一證朱子紹興五年冬十月辛丑受詔講大學大全集經筵講義中大學聖經注亦作一於善與今本必自慊

異而與儀禮通解同則所改者必此三字又何疑乎

及門婺源董惠春校字

跋

朱子之學集諸儒之大成述朱質疑一編集朱子之大成自是
編出朱子之學不惑於異說不迷於歧途內聖外王巨細畢舉
學者由是得門而入雖升堂入室不難矣夫子司諭我婆本身
教爲言教以表彰人倫振勵風俗爲首務數載以來好學敦行
之士莫不爭自濯磨是編畱青百世讀之而興起者必多教澤
之遠正未有艾清躬蒙培植平生妄有論箸夫子誘掖獎勸進
諸西山老友之列深自慙懼無以窺見美富爰附數語以誌私
淑之意云歲在壬子星江門人蕭江清謹跋時年七十

跋

右述朱質疑十六卷吾師當塗夏弢甫先生所箸也先生家學淵源尊甫徵君朗齋公同訓吾郡今已崇祀名宦崇祀鄉賢世共見聞矣先生恪遵先訓所學以朱子爲宗教人皆重倫紀忠孝節烈闡揚不遺餘力下逮民生日用靡不殫心究暢總以根極理要端正厥趨爲主竊謂道之充塞於天地何所不有家自爲學人自爲師百喙爭鳴歧之又歧泛濫無歸鮮不覆溺先生惠之以爲人心陷溺卽世道莊張況士首四民尤慎趨向故出其平日所服膺朱子者爲指南之車顧世知尊奉朱子矣往往

空心枵腹嚮壁虛造老生常談不足以闡明道奧先生於朱子
全書與凡諸子百家之關涉朱子者學術最晚著述同異師友
淵原出處節目莫不參互攷訂按討原流疏通證明一一皆有
顯據近世致力於朱子之學者當湖陸清獻公而後惟寶應家
白田編修咸推有功而此編尤明辨以哲雖以煥奎闇昧循首
訖尾諷誦紬繹亦時時昭若發矇況高明讀之有不怡然渙然
者哉孟子之言曰心之所同然者理也義也理義之悅我心
猶芻豢之悅我口是書息邪詖放淫凡以正心而已心之趨
向既端自無迷惑彼貪常嗜瑣別驚橫驅皆足以病心掃除而

廓清之先生之功豈不偉哉夫朱子之道俟之百世而不惑則
是編所發明亦卽俟之百世而不惑也豈獨吾鄉人士所當奉
爲圭臬乎咸豐二年歲在癸默困敦日躔壽星之次
制科徵舉孝廉方正星江門人王煥奎謹跋

跋

粉榆蔭密幸生長緋塘虹井之鄉櫟樛材庸逾感荷化雨春風
之澤章考亭之道脉大儒筆有千秋祝函丈之心傳小子香惟
一辨溯自松巖萃秀仁里爰居鄆嶽降神哲人迺毓符景星慶
雲之瑞垂象九霄擷經腴史液之精著書萬卷端其趨嚮遠則
循山左魯鄒審厥淵源近則稟河南伊洛鹿洞鵝湖之地緣會
友而勉磋磨講筵秘閣之區思格君而抒論議立社倉免丁絹
野悉起夫歌謠按郡吏厲宰臣朝益推夫風采畢生品學誠英
與京蓋世聲名於何有間詎謂叩寂談空近虛無者入於禪釋

分門別戶肆攻擊者染於黨邪窮高極遠務穿鑿者溺於支離
好異喜新逞聰明者安於妄誕九齡偕子靜詩詞具在齟齬彌
多林栗與胡紘疏草猶存詆排轉力是非顛倒洩私憤以作公
評誣謗沸騰拚真修而名僞學在羣小豪無顧忌主奴烏足重
輕奈後生嘖有煩言附和尤堪痛惜茲際

崇道右文之代正屬尊賢重士之辰使非曲證旁參用以析疑
徵信夫安見人稀曲學而得俾世絕歧趨乎吾師夏弢甫先生
於是慨然有思恬然若喜喜望紫陽之桑梓筮仕是邦思窮黎
渚之津涯導迷此日舊聞可考層樓不少藏書遺緒重尋一鑑

非無活水爰發凡而起例借提要以鉤元恣握槩之辛勤引迥
瀾爲已責包羅六七百載事篇聊踵夫述而賅括十二萬餘言
明曷慚夫述者或述其編摩之歲月或述其橐本之異同或述
其意趣之指歸或述其採搜之姓氏或述其居官之政績或述
其入告之謨猷或述其譜系之厥由或述其師資之所自或述
其正人之契合或述其俗士之訾譏若網之在綱焉有條不紊
如玉之就琢也無玷復畱體大思精結構宛昌黎之範慮周藻
密經營直平子之班以之嘉惠藝林洵爲盛事以之闡揚徽國
尤列功臣魏乎功成美哉觀止雖咨謀咨度法詩之五善於使

臣且鳴謙搗謙象易之六爻於君子然靡疑情之稍蓄更何疑
義之待稽琳供職京華久睽絳帳追思曩昔常侍緇帷早承珍
席之提撕旋樂珠船之寄贈睹葭霜而托詠首怡頻搔盥薇露
以開編手幾難釋謹勞子墨遙申贊歎之忱仍冀賓鴻屢引訓
詞之示咸豐歲在壬子季秋月中澣星江門人程珮琳謹跋

跋

儒者之學所以明道也道之不明雖博極載籍與俗學無異孔子之道得孟子而明孔孟之道得周程張朱而明而朱子尤集其成舍朱子而求至孔孟之域猶杭斷港絕潢而欲至於海其可得乎今取士之途一宗朱子薄海內外罔不誦習朱子之書矣然以是爲科名進取之階而無與於身心克復之實名爲宗之而陰違之又其甚者挾爭奇好勝之心高者入虛無卑者矜博雜反若朱子猶未足以盡道是人心世運之患也吾師當塗夏叟甫先生平生講學恪守朱子以爲造道之的司諭吾邑實

爲朱子發祥之鄉嘗與人言此彈丸之邑幸克秉鐸或非無故而得與學者言必依於朱子娓娓諄諄未嘗或倦口所不盡筆之於書此述朱實疑之所以作也其書分十六卷先生所尤致意者爲前五卷據荅江元適書包揚錄定朱子出入二氏者凡十一年辨荅薛士龍書先生君子句之生字二十餘年句之二字皆爲羨文而後二書所云若合符節向來一切軼轡之處劃然不紊又辨從遊延平受中和未發之旨久而未達者由言敬字不分明之故中和舊說認心爲已發者由延平觀氣象求未發之言有以啓之往問張南軒從先察識後涵養之說者又緣

認心爲已發之故皆與禪陸之學渺不相涉已丑一悟悟於程
子之遺書實悟於遺書中涵養須用敬進學在致知二語凡文
集所載已發未發說荅張敬夫書與湖南諸公第一書記程門
諸子論學同異程子觀養說荅程允夫書皆已丑一時之言非
先生造道之深體道之切烏能剖析精微若是哉先生每謂士
人辭受出處乃立身大節此處一苟則將來功業必不能與古
人頡頏朱子厯事四朝凡授一官進一秩必再三辭謝而後拜
命稍不以道便潔身明志無所瞻顧乃孔孟以來相傳家法作
朱子難進易退譜一篇以爲枉尺直尋之戒先生關心民瘼與

學者言最喜程伯子一命之士苟存心於愛物於人必有所濟
數語以爲隨分隨地皆可有益於世況身膺民社者乎朱子一
生仕於外者僅九載自主簿同安外或以數月或以年餘去官
而其實惠及民之政卓然不可磨滅作朱子外任政績記上下
二篇使學古入官者有所取法其餘考訂朱子著述之同異師
友之淵源後世異學諸儒之議論皆足以扞擷吾道屏斥異端
自來發明朱子之學未有博大精深如是之盛者也先生著述
宏富此編尤流播士林博士福堂先生糾集同人先付剞劂謂
恩政曾與聞纂述之意屬撮舉梗槩以稔同志恩政之 先王

父與先生尊甫 名宦公爲同年友 先君子又與先生之弟
謙甫明府同登辛巳鄉榜三世交遊至深且渥恩政年陶弱冠
便親承警欵二十餘年耳濡目染得於學術行誼者較他人獨
多故敢僭論其書之旨趣以綴諸簡末云星江門人汪恩政謹
跋

跋

文王世子曰凡釋奠者必有合也有國故則否鄭康成釋國故謂若唐虞有夔伯夷周有周公魯有孔子若是乎聖賢所生之地其地之人遂以聖賢增重如此我婺源之有朱子猶唐虞之有夔伯夷周之有周公魯之有孔子也然而朱子之經注列在學宮學者童而習之白首而不知其所以然而好勝之士反得騰其新說數典忘祖厥咎安辭吾師歟甫夏先生秉鐸吾邑以爲是乃朱子桑梓之邦禮之所謂有國故也於是出其平日之私淑朱子者以勗我邑人成述朱質疑十六卷凡朱子平生學

術之次第師友漸被之淵源出處辭受之節目政事設施之紀
綱罔不會萃折衷確有依據而其尤致辨者在別白衆說以定
一尊使學者無適越北轅之患先生之千城朱子於是爲大而
爲朱子之鄉人勗於是爲深昔思文后稷詠家室者必曰有邵
生甫及申詠降神者必曰維嶽爲聖賢所生之地慶卽爲與聖
賢同生斯地之人慶禮之所謂有國故者非卽詩人之意也耶
先生是編雖不專爲婺之人作而實專爲婺之人作婺爲朱子
之鄉苟鄉之人數典而忘其祖無怪乎天下讀朱子之書者童
而習之白首而不知其所以然而好勝之士反得騰其新說也

然則我婆之人其所以承朱子之統緒而無負先生之砥礪者
能無讀是編而興起也乎迪倖與計偕恩恩北上適是編梓成
謹推國故之義附誌簡末以質諸函丈云壬子冬月門人王友
迪謹跋

跋

志聖賢之志學聖賢之學行聖賢之行莫不從讀書始斷斷然
矣然羣天下讀書者無人不讀子朱子之書究何人善讀子朱
子之書無人善讀子朱子之書卽又何人敢述子朱子之書非
不敢也影響者廓臆斷者証依傍門戶者陋別闢畦徑者妄以
是爲述不如不述之愈也故自陸清獻王白田二公後鮮有嗣
音今讀述朱質疑前七卷述朱子學術早晚之異同與著作成
書之歲月精心鉅眼如水銀然無孔不入如日月然容光必照
所以防歧趨而端始念者其卽孟子息邪說之旨與中三卷述

朱子同時諸賢各尊所聞各行所知與朱子以後諸賢負穎異之質挾好勝之心擇精語詳如懸鏡然嫌妍自別如平衡然錙銖不爽所以辨異說而別真修者其卽孟子放淫辭之旨與後六卷述朱子大朝大節外任政績及事親交友與平生襟事明體達用如登岱然示眾山在所宗卽如觀海然示眾流在所歸宿所以黜霸功而崇王道者其又卽孟子距詖行之旨與於戲自朱子至今六百有餘歲矣不謂集朱子之大成者而竟得之吾師也竊嘗謂鄉黨一篇是聖門諸弟子爲孔子繪像凡飲食起居聲音笑貌自中形外畫所不能到者筆一一形容以出之

而是編之於朱子亦然夫乃知吾師之善述吾師之善讀也非
惟吾師一人之善讀而能使人人守是編將如吾師之善讀非
惟使人人善讀一朱子之書而并能使人人推是編之讀法以
善讀凡所當讀之書微哉吾師之心深矣美哉吾師之教善矣
偉哉吾師之功遠矣是編出大見不翼而飛不脛而走夫復何
疑去年冬吾師以述朱質疑四字命式作篆書以顏是編故得
讀是編而不覺如瞽發矇如聵啓闇竊歎其威觸人之聰明也
甚捷今又以讀詩剗記詩章句攷詩樂存亡譜朱子集傳校勘
記古韻表廿二部集說學制統述三綱制服尊尊述義六書轉

注說賈長沙政事疑攷補明陶主敬先生年譜學禮管釋景紫
堂文集共書十二部命式篆其額雖以式之敏不及人而屢蒙
不棄於函丈又安禁不如飢如渴殷殷然願徧讀諸刻爲快也
咸豐癸丑秋七月旣望星江門人程式謹跋

述朱質疑後跋

世之習漢學者動詆宋學爲空疏尊宋儒者又以漢儒爲佔畢其實二者道同一貫兩不相妨賈董鄭服不獨淹通淵博卽其立品植行亦稱一代醇儒宋之濂溪伊洛橫渠諸大賢直接道統至我考亭朱夫子於書無所不讀闡揚聖功發揮王道更所謂集大成者而考亭一生精神所係命脈所依則尙不在此其優入聖域追蹤孔顏所有經濟之宏通學問之賅博皆不過出其緒餘耳

讓

自髫齡隨侍

先光祿公於安徽督學節署得授

書於當塗

夏弢甫夫子蒙日課以四書朱註並讀小學口講

指畫一以紫陽爲宗維時先光祿公按臨列郡先太夫人已

篤疾在床雞初鳴卽呼

讓

起就塾諭之曰爾今得名師須努力

勿懈以期學成箇人吾卽瞑目無憾矣

讓

涕泣受教不敢稍怠

惜爲日未久先太夫人卽下世

讓

讀禮輟業尋又抱病累月隨

扶匱北上遂與吾師遠離嗣

讓

以弱冠之年倖成進士西曹習

律鞅掌簿書於舊業不學將落幸我師以公車應試恒往來於

南北之間先光祿公每延致蕭齋下榻仍令

讓

得以朝夕追隨

親承碎呬如是者又十餘載每聆緒論必以倣濬朱子爲勗

讓

彌覺有所遵循所學亦潛滋暗長後以愚慙獲咎待辜嶺南蒙

朝廷寬大之恩僅以左遷鑄級投閒置散餬口四方橐筆奔馳
依人作計與吾師不得通音問者垂二十年許矣茲者接臂下
車仍爲馮婦分郡於嘉興之乍浦浙椒接壤因得遞達稟函往
返商推言之不足且長言之今歲夏又蒙以所著詩禮文集及
述朱質疑各刊本郵寄益徵在遠不遺誨人不倦謙鹽微細讀
昭若發矇迴首立雪程門依然昨日撫今追昔涕下沾襟念謙
於吾師之學雖未能窺測高深於萬一惟敬讀述朱質疑一編
而竊爲吾道幸也伏以我

朝之尊崇孔孟超越古今卽隆重考亭亦爲元明前代所未有

人人心中有一孔孟卽人人心中有一考亭而世之詆毀考亭者正昌黎詩所謂鼪鼯撼大樹可笑不自量也惟讀來論所云不惟與之立異者爲人心風俗之害卽篤信朱子之學而豪釐之差謬以千里形於學術施於政事其患有不可勝言者是篇辨別繁具苦心欲急索解人不可猝得讓雖不敢自謂解人而猶憶昔年在塾時曾舉閻氏潛邱劄記內兩語以示讓有云天不生仲尼萬古如長夜天不生考亭仲尼如長夜讓今更爲之進一說曰天不生吾師將考亭亦如長夜是吾師有功於考亭卽有功於洙泗正不獨檀弓辨誣一書足以干城名教也至攷

究漢學之淵深著作古文之淹雅則已有諸同人之各政在讓
莫能贊一辭矣

咸豐八年歲在戊午季夏之月

賜進士出身

賞戴花翎候選道補用府浙嘉乍防同知潞河門人白讓卿謹
跋

述朱質疑後跋

朱子之學直接魯鄒乃金谿敵之於前姚江攻之於繼而近日考据家復操戈相向夫陸王以禪學改正學猶曰異端不同道也至考据家同在一室之內而搜爬瑣屑拾朱子所已究及而姑舍之者以詆朱子譬則子弟侮父兄奴僕叛家主尤堪詫異者矣宋元以來尊信朱子者莫不力持正論塞距邪說雍乾中吾鄉汪雙池先生深入顯出大聲疾呼其保衛朱學宗傳直如孟子之於孔子至矣然其言直從天人性命大本大源處發揮後學或未能遽窺其所以然而不悉其層累曲折之故當塗

夏敬甫先生著述朱質疑十六卷節解目疏條分縷析事必徵實鉅細兼該成學之士既總會其立言之旨後生小子亦可得其從入之途天下不可無此書朱子故鄉尤不可無此書也然則先生之官婺源真爲不虛行婺源之得先生司鐸良非偶然矣昔先大父師事雙池先生於朱門有淵源一脈之義小子泛濫半生晚乃知歸一是讀先生此編不禁感愧交并云同治甲子季夏月後學余龍光謹跋